



Bentiaraq Ottosen

UPA 2026/33-1

Atassut

6. Maj 2026

Politiit Immikkut Paasiniaasartui (PET) pillugit inatsisip allanngortinneqarnera pillugu inatsimmi, illersornissaqarfiup politiillu immikkut paasiniaasartui pillugit ataatsimiititalianik pilersitsisoqarnissaa pillugu inatsimmi aamma pasinapiluttunik kalerriisartut illersorneqarnissaat pillugit inatsimmi (Immikkut paasiniaasartut nakkutilliivigineqarnerisa patajaallisaavigineqarnerat) § 1-p Kalaallit Nunaannut atuutilersinneqarnissaa pillugu peqqussut pillugu missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

Siullermik erseqqissassarumavara Atassutip pingaartitarimmagu toqqissisimaneq aammalu innuttaasut pisinnaatitaaffiisa illersorneqarnissaat. Nunatsinni qulakkeerneqartariaqarput, immikkut paasiniaasartut sulinerat inatsisit naapertorlugit ingerlanneqassasoq, aammalu taanna sulineq nakkutigineqarlunilu akisussaaffigineqassasoq.

Taamaattumik Atassut isumaqarpoq pitsaasuusoq, immikkut paasiniaasartut pillugit ataatsimiititalianik pilersitsinissaaq, kiisalu pasinapiluttunik kalerriisartut illersorneqarnissaat. Tamanna qulakkeerinneqataavoq, ammasumik ingerlatsinissamik aammalu tatiginartumik ingerlanneqarnissaanik.

Peqatigitillugu Atassummiit pingaartillugu erseqqissaatigerusupparput, Nunatsinni immikkut ittumik pissutsit eqqarsaatigalugit aaqqissuussinerit atuutilersinneqarnissaat. Uagut nammineq inuiaqatigiittut pisariaqartitatsinnut naleqquttumik aammalu kulturitsinnik ataqqinnilluni ingerlatsisoqarnissaa pingaartillugu.

Atassummiit inuiaqatigiinni tamat oqartussaaqataanerput; kiffaangissuserput maannakut pigisarput illersorumallugu nunanit allanit tatisimaniarneqarnitsinni siunnersuutip imarisaa nakkutilliinerusoqarnissaanik siunertaqartoqarnera toqqammaviatigut iluarisimaarparput. Ulluni makkunani killiffitsinni Nunatsinni imaannaanngitsumik nalaataqartarnitsinni iliuusissaaleqiffiusunik nalorninartunillu misigisaqartarsimanerput amerlanerusugut ilisarinnaassajunnarsivarput. Matumanilu kissaatiginarpoq (PET) Nunatsinnut ataqqinnittumik suleqatiginnilluarnissaat paasissutissat Nunarput pineqartillugu pisariaqarfiat naapertorlugu Nunatta oqartussaasuunik ilisimatitsissutigineqartarnissaat.



Naggataatigut Atassut isumaqarpoq siunnersuut tapersernartuusoq toqqammaviatigut, kisianni erseqqissaatigerusupparput atuutsinneqarnissaanut Nunatsinnut naleqqussarneqarnissaa kissaatiginarmat, aammalu innuttaasut pisinnaatitaaffii tamatigut qitiutinneqassammata.

Taama oqaaseqarluta Naalakkersuisut siunnersuutaat taperserparput, Inatsisinut ataatsimiititaliamut innersuullugu inassutigaarput.